

Date – 17/02/2025

Time - 18:30 -18:40Hrs

REGIONAL NEWS BULLETIN

HEADLINES (EVENING)

- 1. Pu TBC Lalvenchhunga MLA chuan, Lengpui Airport chu Indian Air Force kaltlangin changtlung zawka siam theih dan an dap mek chauh a ni a ti.**
- 2. Chakma Autonomous District Council a BJP Sorkar, Pu Molin Kumar Chakma hruai chuan House ah fiahna a paltlang.**
- 3. Union Finance and Corporate Minister Nirmala Sitharaman chuan vawiin khan Mutual Credit Guarantee Scheme for MSME chu Mumbai ah a tlangzarh.**
- 4. Union Education Minister Dharmendra Pradhana chuan National Education Policy ah hna zawng mekte bakah hna siamtute tan hmalakna tur dah a ni a ti.**

<><><>

TBC

Adviser to Chief Minister Pu TBC Lalvenchhunga MLA chuan, Lengpui Airport chu Indian Air Force kaltlangin changtlung zawka siam theih dan an dap mek a, state danga mipuiten IAF Airport an va tawm zawk ang kha ni lovin Lengpui airport IAF in an rawn tawm ve zawk dawn tihna a ni ber, a ti

Vawiin khan ZPM General Headquarter chuan party office-ah chhung inkhawm an hmang a, thusawitu, Pu TBC Lalvenchhunga chuan Mizoram sawrkar in IAF kutah Airport a pe dawn lova, ramín a hlawkpui theihna tur leh changtlung zawka siam tum a ni zawk a ti a, Lengpui Airport hi naktuka hlan mai tur niawm taka ngaihna pawh a diklo a ni a ti.

Vawiina IAF kuta Airport hlan duh lotu te hian kum 2011 ah ram 32 Acre zet mai Jet Fighter thuhrukna tur a lo pe tawh a, Kum 2022-ah AAI in Mizoram sorkar-ah MoU draft a rawn thawn leh a, khatihlaia sorkar MNF ten an tihpuitlin hmain sorkar a inthlak chho zui ta mai zawk a, xhuvangin ZPM sorkar hmalakna a ni bik lova, party pahnih sorkar tawhte hma lo lak tawhna bawhzuina mai a ni, a ti bawk.

Kum 2019 leh 2022 ah khan IAF hnenah Lengpui ah 97 acre a zau leh Sihphirah 5 acre a zau MNF sorkar khan No objection an lo pe fel vek tawh a, tun dinhmunah a hlau ber anga an rawn au leh si chu amak hlea a hriat thu a sawi bawk.

<><><>

MHIP

Mizo Hmeichhe Insuihkhawm Pawl (MHIP) General Hqrs chuan Salem Venga Pi Rebek Chanchinthangi rawng taka thah a nih chungchangah an tawrhpu zia leh duhlohzia lantirnan vawiin khan Vanapa Hall kawtah an pungkawm.

Women & Child Development Minister Pi Lalrinpuui chuan he hun hi hmanpuuin tualthattu C. Lalsiamliana chu a chungah dan anga hremna pek ngei a nih theih nana hmalak nise a duh thu a sawi a. Hmeichhiate chungah hleihlenna veng turin Department chuan theihtawpin hma an lak thu sawiin kalkhawmte chu harsatna hrang hrang an tawk a nih chuan phone number 181 ah engtiklai pawhin protection officer te pui turin biak theih reng an nih thu a sawi bawk.

MHIP General Headquarters President Pi Ngurmawii Sailo chuan Pi Rebek-in a pasal C. Lalsiamliana kut tuara boralna hial a chungah a thleng chu pawin an tih thu sawiin, tualthattu C. Lalsiamliana chu a phu tawk hremna hmu ngei se an duh thu a sawi.

Vawiin hun hmanna ah hian MHIP branch hrang hrang atangin mi thahnem tak an puang khawm a, au rualna hun hman a ni.

<><><>

CADC

Chakma Autonomous District Council a BJP Sorkar, Pu Molin Kumar Chakma hruai chuan House ah fiahna a paltlang.

Tun thlatir ni 4 a Chakma Autonomous District Council, Chief Executive Member atan a lakluh Pu Molin Kumar Chakma chu Governor ruahmanna angin vawiin khan CADC Session ah Member thlawptu a neihdan fiah a ni a, Member tamzawkin in CEM hi an thlawp vingin, CADC a BJP Sorkar chuan fiahna a paltlang.

Mipui thlan Member 20 awmna Chakma Autonomous District Council ah hian, vawiin a Sorkar fiahna CADC Chairman Pu Mohan Chakma kaihhruai ah Sorkar thlawp zawngin Member 14 ten ban an phar a, Member pathum in a ep zawngin ban an phar thung a, Member pahnih Session ah an tello.

<><><>

RRR

MLA Pu Robert Romawia Royte, MNYF President chuan Central sorkarin Mizoram a zuam ta lutuk chu a pawin a, hnam party a sorkar leh a ngai, a ti.

Vawiin Aizawl-a MNF Party Office Mizo Hnam Run ah thusawiin Pu Robert Romawia chuan central sorkar chuan North East State-ah Mizoram a zuam ber, a ti a, Free Movement Regime - Burma nena inkalpawhna chu Mizoram Chief Minister chuan Delhia a zin tumin Central sorkar thu a nih thu a thlen a. Assembly-ah ZPM MLA-in FMR dodalna a putluh chu zaah zain MNF chuan a thlawp a. Amaherawhchu, nikum Dec ni 30 khan Mizoram sorkar chuan order tichhuakin Mizo mipuite tan mai ni lo northeast tribal mipuite tana thil tha lo tak FMR hlihna chu kalpui a ni ta a, MNF chu la sorkar se a tih loh tawp tur a ni ang," a ti.

<><><>

BJP MIZORAM

State Day of Prayer Committee chuan Mizoram State BJP Office an tlawh a, State President Pu Vanlalhmuaka n]leh a thawhpui ten lo dawngsawngin, State tana kohhran bik awm lo leh Party lam engmah sawi lova, ram leh hnam damna tur atana țawngțaina hun buatsaih a ni chu a lawmawm a ti.

Ram vei tute'na ram leh hnam damna tur leh hmasawwna tur atana hmalakna a awm chu a lawmawm hle a, BJP chuan an din chhan Mizoram leh Hnam tan a nih avangin, chumi tih hlawhtlinna bul chu Pathian chauh a ni a, he țawngțaina hun pawimawh tak ah hian BJP hruaitute leh Member-te atam thei ang ber kal turin an in buatsaih dawn a ni," a ti.

Rev. R. Lalrinmawia chuan, "BJP Mizoram he ni an ngaih pawimawhna ah lawm thu a sawi a, MLA te, BJP hotute bakah Member a tam thei ang ber he hun hman pui theuh turin an sawm a ti.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

SAITUAL

Saitual District Bawrhsap Dr. Lalngura Tlau chuan vawiin khan tuihna humhalh kawnga hmalakna ‘Watershed Yatra’ a hawng.

Dr. Lalngura Tlau chuan Pradhan Mantri Krishi Sinchayee Yojana (PMKSY) WDC 2.0 hnuaia Saitual District-a hmasawwna hrang hrang hmuh tur awm chu lawmawm a tih thu a sawi a. He scheme-in a tum ber chu tuihna siam leh humhalh te, lei chunglanga lei tha kal ral tur ven te, inrenchem taka thlai tui pek te leh mipuite tana eizawwna hrang hrang siam te a ni, a ti. Dr. Lalngura Tlau chuan he scheme hnuaia project hrang hrang hmangin chhungkaw tam takin eizawwna ngelnghet an neih phah thin tih sawiin, hemi kawngah theih tawp chhuah zel turin leh he scheme kalpuinaah hian faina lama tan la lehzual turin line department te chu a sawm nghal a ni.

DRDO SMS Pu Lalhmingmawiachuan PMKSY WDC 2.0 chu Saitual District-a Pawlrang leh Hliappui khuaa kalpui a nih dan a sawifiah a.

Watershed Yatra chu tuihna chungchang mipuiten an hriat fiah lehzual nana awmze nei tak a hun bik an hman a ni. Watershed chungchanga awareness campaign zau zawka neih a nih theih nan Ministry of Rural Development, Department of Land Resources chuan India ram pumah 15th January atanga 31 March, 2025 thleng hian watershed yatra neih ni se tiin a ruahmanin, he hunah hian activity chi hrang hrang neih tur a ni.

<><><>

UNION FINANCE MINISTER

Union Finance and Corporate Minister Nirmala Sitharaman chuan vawiin khan Mutual Credit Guarantee Scheme for MSME chu Mumbai ah a

tlangzarh. Union Finance Minister chuan an scheme hawn tak chuan MSME te nasa takin hma a sawn tir dawn tih sawiin tunhnai budget pathumah pawh MSME te thlur bing an ni a ti a. He Scheme hian MSME te tan loan cheng vabelchhe 100 thleng an bungrua leh hmanraw lei nan a pe dawn a ti a. Pi Sitharaman-i chuan sawrkarin sumdawnna lama sum peipung duh investor te chu hlep tha tak a pe let tih sawiin ralthuam siamchhuahna lamah pawh sawrkar chuan policy tha tak tak siamin investorte tan hlawkna a pe nasa a ti a. Hei vang hian ralthuam thawncchhuah pawh cheng vaibelchhe sing 2 leh sang 4 hu in a thang a ti a. Maharastra chu ralthuam siamna hmunpuiah a insiam chho mek a ti bawh a ni.

<><><>

UNOIN EDUCATION MINISTER

Union Education Minister Dharmendra Pradhana chuan National Education Policy ah hna zawng mekte bakah hna siamtute tan hmalakna tur dah a ni a ti.

Vawiina New Delhi-a Hindu College din cham vawi 126 naah he thu hi sawiin Union Minister chuan ramchhung thalaite chuan hna nget, khawsak phung pangngai, eibar dinhmun tha an mamawh a ti a. Pu Pradhana chuan ramchhunga zirbingna research ti changtlung zel turin a hranin Foundation din tum a ni a ti a. Sawrkar chuan Anusandhan Natnioal Research Foundation din tumin hma a la tih a sawi a. Ramchhunga industry te tan a pung awm loin loan cheng vaibelchhe nuai 1 ruahman tawh a ni a ti bawh. Union Minister chuan zirlaite chu an sum hmuhte research leh ngaihtauhna thar hman nan tangkai taka hmang turin a chah a ni

<><><>

CBSE

Central Board of Secondary Education-CBSE chuan 2025 board exam-a zawhna putrua anga thuthang chu thudik lo anih thu a puang.

CBSE chuan social media lamah zawhna putru anga thu thehdarh chu Board chuan a ngai thutak hle tih sawiin heng thuthangte hi behchhan nei lo leh zirlaite ti chiai tura thehdarh anih thu an sawi a. Hetianga thu diklo thehdarhtute hi zawn chhuah an nih tur thu a sawi bawh a ni

<><><>